



Komunikadu Imprensa

Periodu: 2011

Edisaun: 28/06/2011

Arguidu ba kazu tentativa abuzu seksuál hasoru menor hetan pena prizaun tinan neen

Iha loron 22/06/2011 Tribunál Distrital Dili hala'ó audiénsia julgamentu hodi lee leitura akordaun ba kazu tentativa abuzu seksuál hasoru menor. Kazu ne'e registadu iha Tribunál Distrital Dili ho numeru prosesu 339/C.ord/TDD.

Tribunál ho kompozisaun juiz kolektivu, hamonu pena prizaun tinan 6 ba kondenadu, tanbá provadu, komete tentativa abuzu seksuál hasoru lezada JS ne'ebé mak sei iha idade menor (tinan 12).

Audiénsia julgamentu ne'e preside husi juiz João Ribeiro nu'udár Juiz Presidente, no akompaña husi Dr. Duarte Tilman no Dr. Jose Goncalves nu'udar juizes membru ba painel ne'e. Aliende ne'e, husi parte Ministériu Públiku, reprezenta husi Dr. Jose Luis Landim, no husi parte defeza, reprezenta husi Dr. Fernando Lopes husi eskritoriu Defensoria Públika.

Diretór JSMP Luis de Oliveira Sampaio haktuir katak "JSMP kongratula no apresia desizaun ne'ebé mak hamonu husi tribunál kolektivu, tanbá desizaun ne'e manifesta komitmentu estadu nian liu husi tribunál no ajente prosesual sira atu proteze, labarik sira husi kualker forma ka karakter violensia ne'ebé afeita ba sira nia futuro.

Tuir lei penál Timor Leste nian iha artigu 23, "*hahalok kondenadu nian nu'udar aktu ne'ebé mak punivel, tanbá mesmu intensaun ka rezultadu husi krime ne'e la konsege realiza, maibe tanbá deit sirkunstansia ne'ebé mak laiha relasaun ho kondenadu nia vontade rasik*".

Bázeia ba faktus provadus ne'ebé mak lee iha audiénsia julgamentu katak; iha loron 26/07/2010, maiz ou menus oras tuku 08: 30 kalan, arguidu ba kous lezada ne'ebé mak toba hela iha varanda hodi lori ba uma laran, hatoba nia iha sala vizita, hamate ahi iha uma laran no komesa kolu hotu lezada nia kalsa no nia kalsa rasik, no tenta halo violasaun seksuál hasoru lezada, maibe la konsege realiza tanbá lezada nia inan ho lezada nia alin toman arguidu hodi hakilar. Ikus mai arguidu hakfodak no hatais fali nia rounpa no husik hela lezada.

Tuir observasaun JSMP nian, pena ne'ebé tribunál hatun ba kondenadu bázeia ba akuzasaun Ministériu Públiku ne'ebé mak refere ba artigu 24 juntu artigu 177 ho pena prizaun to'o tinan 6.

Mesmu nune'e, tribunál sei fo oportunidade ba parte sira atu apresenta rekursu na Tribunál Rekursu tuir lei prosesu penál, durante tempu loron 15 ba partes sira hodi halo rekursu hasoru desizaun tribunál.

Atu hetan informasaun kle'an, favor kontaktu;

Luis de Oliveira Sampaio

Diretór Ezekutivu JSMP

Telefone: 3323883/7295795

Email; luis@jsmp.minihub.org